

आकाशवाणी

- राष्ट्र अज्ज डॉ. अम्बेडकर होरें गी उंदी 134मीं जयंति च श्रद्धांजलि भेंट करै करदा ऐ।
- 2 प्रधानमंत्री नरेन्द्र मोदी होर अम्बेडकर जयंती दे मौके उपपर हरियाणा जाइयै केई सारी विकास परियोजनाएं गी शुरु करोआडन।
- तमिलनाडू ते केरल अज्ज नमा ब'रा मना करदे न।
- अमरीका अगले इक दो म्हीने दे अंदर स्मार्ट फोन, सैमीकंडक्टर ते कम्प्यूटर दे पुर्जे दे आयात उपपर बक्खरे तौरा पर टैरिफ लाग।
- भारत नै तीरंदाजी विश्व कप प्रतियोगिता दे पैहले गेड़ च मर्दे दे रिकरव मकाबले च चांदी दा तगमा जित्तेआ ऐ।
- आईपीएल च होए दे मकाबलें च कल मुंबई इंडियन्स नै दिल्ली कैपिटल्स गी 12 रंजे कन्नै हराई दित्ता।

<><><><><><>

Ambedkar Jayanti

राष्ट्र अज्ज भारतीय संविधान दे मुख निर्माता डॉ. बी.आर.अम्बेडकर होरें गी हुंदी 134मीं जयंति दे मौके उनेंगी श्रद्धांजलि अर्पित करा करदा ऐ। इस मौके समूलचे देसै च नेके कार्यक्रमें दा सरिस्ता कीता जा करदा ऐ। राष्ट्रपति द्रौपदी मुर्मू, उपराष्ट्रपति जगदीप धनखड़, प्रधानमंत्री नरेन्द्र मोदी, लोकसभा अध्यक्ष ओम बिरला, मंत्री, संसद ते होर दुए मन्ने परम्मने दे लोकें अज्ज बडलै संसद भवन परिसर च बाबा साहेब हुंदी प्रतिमा पर फुल्ल चाढ़ा करदे न। बाबा साहेब होरें नेकां भूमका नभाइयां न जियां जे समाज सुधारक, अर्थशास्त्री, सियासतदा। उनें अपना जीवन लोकें दे नमित कीता। बाबा साहेग भीम राव अम्बेडकर होरें समाज दे हाशियै पर खड़ोते दे वर्गे खलाफ समाजी ते जातिगत फर्कोफर्की खत्म करने लेई जीवन भर कम्म कीता। उनें आजाद भारत दे पैहले कनून ते न्याह मंत्री बने। 1990 च मरणोपरांत उनेंगी भारत दे सब्बने शा बड्डे नागरिक सम्मान शा बड्डे नागरिक सम्मान भारत रत्न कन्नै सम्मानत कीता गेआ।

<><><><><><>

President-Ambedkar

राष्ट्रपति द्रौपदी मुर्मू होरें डॉ. बी.आर.अम्बेडकर हुंदी जयंति पर लोकें गी शुभकामनां दित्तियां न। राष्ट्रपति होरें अपने सनेए च आखेआ जे अपने प्रेरक जीवन च बाबा साहेब होरें बड़ी मती दिक्कतें—परेशानिएं दा सामना करदे होई बी अपनी इक बक्खरी पंछान बनाई ते अपने बेजोड़ उपलब्धिएं कन्नै दुनिया भर च मान हासल कीता। राष्ट्रपति होरें बाबा साहेब होरें गी इक अदभुत क्षमताएं आले ते केई चाल्ली दे व्यक्तिगत आले माहनू करार दिंदे होई इस गल्लै गी उजागर कीता जे ओह इक अर्थशास्त्री, शिक्षाविद, न्यायविद ते इक महान सुधारक हे। उनें आखेआ जे बाबा साहेब इक समाजवादी समाज दे पक्खै दे पैरवीकार हे ते उनें महिलाएं ते वंचित वर्गें दे माली ते समाजिक अधिकारें लेई पूरे जीवन संघर्ष कीता।

<><><><><><>

PM-Hararyana

प्रधानमंत्री नरेन्द्र मोदी होर अज्ज अम्बेडकर जयंति दे मौके पर हरियाणा दा दौरा लांगन ते हिसार थमां अयोध्या लेई कारोबारी डोआरी गी सैल्ली झंडी दस्सगंन। एह्दे कन्नै गै ओह हिसार हवाई अड्डे दी नमीं टर्मिनल इमारत दा नींह पत्थर बी रक्खगंन। श्री मोदी हुंदा इक जनसभा गी संबोधत करने दा बी कार्यक्रम ऐ। एह्दे मगरा प्रधानमंत्री यमुनानगर च विकास परियोजनाएं दा उद्घाटन ते नींह पत्थर रक्खगंन। गोबर्धन योजना दे नजरियै गी अग्गे बधंदे होई प्रधानमंत्री यमुनानगर दे मुकराबपुर च इक बायोगैस प्लांट दी बी आधारशिला रक्खगंन। ओह 14.4 किलोमीटर लम्पू रिवाड़ी बायपास दा उद्घाटन करगंन जेह्ड़ा भारतमाला परियोजना तैह्त् पूरा कीता गेआ ऐ ते एह्दे पर इक 1 ज्हार 70 करोड़ रपे दी लागत आई ऐ जेह्दे कन्नै रश च कमी औग ते दिल्ली नरनोल बश्कार फासला घट्ट होग।

<><><><><><>

Tamil News Year

तमिलनाडू ते केरल अज्ज नमां ब'रा मना'रदे न। पुथांदू जिसी तमिल नमां ब'रा नां कन्नै मनाआ जंदा ऐ। एह् ध्यार दुनिया भरे च पूरे जोश कन्नै मनाया जंदा ऐ। एह् तमिल म्हीने चिथीराई दे पैह्ले ध्याड़े मनाया जंदा ऐ। इस ध्याड़े तमिल लोक किट्ठे होंदे न ते इस ध्यार गी मनांदे न।

<><><><><><>

US

अमरीका अगले इक दो म्हीने दे अंर स्मार्ट फोन, सैमीकंडक्टर ते कंप्यूटर दे पुर्जे पर बक्खरे तौर पर टैरिफ लाग। एह् घोषणा कामर्स सैक्रेटरी होवर्ड लुतनिक होरें कीती ऐ। एह् कारवाई

अमरीका आस्सेआ इलाक्ट्रानिक समेयान दे आयात जेह्दे च सैमीकंडक्टर बी शामिल न, गी टैरिफ थमां बाहर रखने दे घोषत दे इक दिन मगरा कीती। लुतनिक होरें अमरीका च चिप ते प्लैट पैनल टीवी अमरीका च बनाए जाने पर जोर पाया।

<><><><><><>

Archery

तीरंदाजी विश्व कप दे पैहले गेड़ च धीरज दास, तरुणदीप ते अतानु दास दी भारतीय मर्दे दे रिकरव टीम नै चांदी तगमा जित्तेआ ते तिकड़ी कल रातीं चीन थमां 1–5 कन्नै हराई दित्ता। सीजन दे शुरूआती खेड्डें च एह भारत दा त्रीआ तगमा हा ते चौथे तगमे पर बी भारत दी नजर बनी दी ऐ की जे भारत मर्दे रिकरव व्यक्तिगत प्रतियोगिता च दावेदारी अजें बने दे न। इस थमां पैहले भारत नै कंपाउंड मिक्स्ड टीम प्रतियोगिता च कैह दा तगमा हासल कीता हा।

<><><><><><>

IPL

कल रातीं दिल्ली दे अरुण जेटली स्टेडियम च खेड्डे गेदे आईपीएल मैच च मुंबई इंडियन्स नै दिल्ली कैपिटल्स गी 12 रंजें कन्नै हराई दित्ता। तिलक वर्मा दे 59 रंजें दी बदोलत कन्नै मुंबई इंडियन्स नै 205 रंज बनाए। रिकल्टन, सूर्य कुमार यादव ते नमन होरें बी उपयोगी योगदान दित्ता। परते च दिल्ली कैपिटल्स दे करुण नायर दी 49 गेदें च 89 रंजे दी पारी दे बावजूद दिल्ली कैपिटल्स 193 रंजें पर गै ऑल आउट होई गई। कल खेड्डे गेदे दुए मैच च रॉयल चैलेंजर्स बैंगलुरु नै राजस्थान रॉयल्स गी 9 विकटें कन्नै हराया। अज्ज लखनऊ सुपर जायंट्स दा मकाबला चेन्नई सुपर किंग्स कन्नै होग ते मैच साढ़े 7 बजे शुरू होग।

<><><><><><>